

國朝耆獻類徵初編卷三百六十七目錄

忠義三十七

毛大瀛

余文泰等

凝德

王百忍

馬旺等

馬存

鐵銀等

黃富國

邢永襄等

張發祥

馬麒等

郭承緒

張喜等

楊春和

張斌

邱榮升

謝位揚等

耿貴和

康調元等

馬德舒

周華長等

王萬岱

安榮庫

和興額

阿爾當

捷慶等

李殿魁

陸建敏

陳五輯

郭洪

邊奏凱

馬負圖等

海進龍

汪銓

宋英

張恩錫

傅廷剛

張聯程

吳振亮

陳應彪

李杰

張雲鳳

郭永泰等

孫斯禮

黃大勇等

三福

賽尙阿

姚國棟

畢振林

國朝耆獻類徵初編卷三百六十七

通奉大夫前署江西巡撫江西布政使司布政使湘陰李桓輯
忠義三十七

毛大瀛

余文泰等

毛大瀛江蘇寶山人由附監生充四庫全書館謄錄議敘州同分
發陝西試用乾隆四十九年丁父憂回籍五十三年服闋仍赴陝
省時河南巡撫畢沅督辦湖北荊州萬城隄工以大瀛途次謁見
奏請帶往分辨尋復奏畱楚省補用五十四年署漢陽府通判旋
丁母憂回籍五十六年山東巡撫惠齡奏准發往東省辦理城工
河工服闋畱東補用署利津縣縣丞尋以大兵征廓爾喀惠齡升

四川總督辦理濟隴糧務奏帶大瀛赴西藏差遣事竣畱川補用
借補潼川府經歷隨營辦事旋以軍功升中江縣知縣嘉慶元年
檄赴湖北軍營隨剿教匪以功升四川簡州知州時惠齡由湖北
入川沿路剿辦大瀛從之三年克大鵬寨擒逆首羅其清大瀛在
事出力 賞戴花翎四年回簡州任五年張子聰股匪竄潼河擾
三臺中江地總督勒保參贊德楞泰兩路截剿賊復分擾遂甯樂
至安岳資陽等處由金堂之廣元寺肆行焚掠延及簡州境大瀛
率鄉勇前往堵禦行抵土橋溝猝遇馬步賊蜂至力戰遇害事
聞 諭曰毛大瀛因眾寡不敵中途被戕著咨部賜卹是年南江縣
訓導余文泰防守城池殺賊陣亡署太平縣主簿蔣曰紀於界牌

擊賊力戰陣亡先後得 旨賜卹均 賞雲騎尉世職襲次完時
以恩騎尉世襲罔替大瀛孫嶽生襲文泰子廷松襲曰紀子存棟
襲文泰四川成都人曰紀河南睢州人

右 國史館本傳

此手書一紀事詩二毛君守簡州城時所寄也君名大瀛寶山縣
諸生善屬文及詩試輒不利五十外以薦舉得官教匪起湖北蹂
躪陝西河南四川諸處大府奏君隨營以功擢知縣尋又擢簡州
知州土賊復起君城守踰時援不至城陷罵賊不屈死距發書時
僅五月耳君爲幕府牋奏最工業此者二十年其在山東巡撫國
泰幕幾十年國泰者君在京邸時素識約爲兄弟者也出官山東

卽挾之以行國性暴戾妻子僕隸皆若不可一日共居獨重君始
終無纖毫芥蒂君質直嘗數其過國受之不校也國盛怒時或至
扑妻子刃僕隸獨得君數語卽解以是署內外事君如神明國亦
飭所親下人奉君若奉己君或赴試則一府中環以泣阻其行若
勢不可畱則各囊金以贈君一入試則所獲無算君亦隨手輒盡
不餘一錢也在幕府日國四鼓卽促君起然巨燭與分案治官文
書日出事始竣國讀書不甚分句讀願酷嗜作制舉文日必拈一
題強君共作方御史錢澧之特糾國及山東虧缺庫項也 上心
動 特命親信大臣偕御史晨夕馳往勘實其弟國霖覘知之募
善走者先半日馳抵濟南國蒼黃喪魄時署中積金寶無數因乘

夜運入司庫及運司首府首縣各庫以補缺項然存金尙纍纍公
解後有珍珠泉深丈許遂昇至泉側沈之後撫臣明興濬池尙得
金數十萬蓋國黷賄如此事大露逮國入都下刑部獄治罪君亦
隨入時以諧語寬解一日國檢衣底出一大珠圓徑寸授君曰畱
此無用以遺兄君曰弟事解後此卽可充貢僕無用處也居久之
國忽得妄耗謂君曰事可無慮兄處此已久可暫出洗沐君乃出
然國卽以其夕 賜死君偕其弟入哭檢所爲珠已失之矣余識
君在武昌總督署復有吳門項君字直庵忘其名項君故浙江巡
撫王直望客也方王遭母憂擁妻妾居會垣並日事讌會爲人所
發王亦知罪且不測而積重貲至多因闔門召幕客散給之數或

三萬五萬不等屬曰若無事歸我半事不測則諸君盡畱之時項適省親歸不及預後數日至王嗤之曰日前稍有分餉而君不來何遲蹇若此項固寒士又極知足則對曰暴得重金不祥前日卽在亦不願預王笑置之居數日王甘肅匿災冒賑及監糧案併發卽日逮入都諸幕客竄已無影項獨送至鎮江王強項曰必送我清江浦俟登陸乃返項允之同舟渡江王忽慨然曰幕中某某吾待之極厚竟無一送我者今走千里反在君吾愧甚因懷中出一硯曰此宋蘇文忠公物也籍沒時獨寶此不忍舍故尚在耳以贈君儻入都後蒙 恩不死異日必措萬金贖硯復賦詩一章贈項王入都卽伏法後項幕橐稍裕感王意別購一室貯此硯及所贈

詩不一歲室燬於火硯及詩並燬燼後幕客得王重賞者五年內
不病死卽子嗣夭絕無一終享其利者余嘗謂毛及項曰二巡撫
者谿壑可謂不易滿矣至谿壑一滿而要領遂絕徒使己受惡名
而人享其利計亦大左甚至享其利者不身死卽嗣絕是貪吏之
金與酖毒又何以異癸亥三月暴書得君此札跋竟復書此以爲
服官者戒

右跋後洪亮吉撰

[illegible]

凝德

凝德烏雅氏滿洲正黃旗人父官保吏部尙書自有傳乾隆二十九年凝德由拜唐阿挑補藍翎侍衛三十七年授鑾儀衛治儀正四十五年升雲麾使五十年遷冠軍使五十五年升直隸獨石口協副將六十年調督標中軍副將嘉慶元年川陝楚邪匪不靖凝德調赴湖北軍營四月協剿首逆黃玉貴於紅土山奮勇殺賊七月敘功 賞戴花翎二年四月赴孤山衝剿賊六月在沿江一帶陸續拏獲賊目曹漢東等五名並逸賊阮金山等四百十三名十二月王三槐羅其清擾渠縣所屬地方凝德帶兵駐紅架壩截殺賊匪甚眾三年帶兵駐窩堂廟以斷孫家梁賊匪後路四年四月

奉檄防堵二郎壩等處五月由花長溝開道躡賊追殺五十餘里
殲斃三百餘名是月升甘肅巴里坤總兵六月西安將軍恆瑞督
剿甘省賊匪檄凝德帶兵一千赴三曹河堵截賊北竄凝德兼程
追及老柏樹敗之殲獲甚眾七月隨恆瑞追賊分路向牟家壩兩
河口一帶截殺賊不敢抗拒向東逃竄五年賊目蔡掌櫃合辛聰
餘黨將竄秦安伏羌等處恆瑞飭凝德由秦安兜截適謠傳賊圍
伏羌縣城恆瑞以大隊往援而凝德帶兵四百赴之相去四十里
猝遇賊匪三四千人弁兵以眾寡不敵請急走伏羌凝德不可率
眾拒賊手弓射斃二匪力竭陣亡事聞命下部議卹尋賜
祭葬賞騎都尉世職孫崇壽承襲

右 國史館本傳

國朝書牘類行不絕
卷三
六

王百忍 馬旺等

王百忍直隸行唐人由武舉揀發鎮定鎮標學習乾隆五十九年
補右營把總嘉慶元年四月隨征湖北教匪奮勇有功十二月升
千總五年追賊至甘肅伏羌縣陣亡是年甘肅河州城守營千總
馬旺在西園鄉擊賊陣亡陝西西安軍標右營把總王民直隸龍
固營把總魏曰連蔚州路把總閃美玉房山營把總劉忠西安軍
標右營外委黃榮俱於牛驪灣擊賊陣亡事 聞均 賜卹如例
賞雲騎尉世職百忍子廷統襲旺子喜元襲民弟明襲曰連子之
珠襲美玉子逢時襲忠子殿元襲榮子秀襲旺甘肅河州人由行
伍於乾隆四十六年隨征撒拉爾逆回五十四年拔補循化營外

委嘉慶元年升把總二年率撒拉爾士兵剿捕西鄉縣教匪著有戰績四年升本職民陝西長安人由行伍隨征蘭州逆回屢著戰績拔補本職曰連直隸正定人由行伍於乾隆五十四年拔補正定鎮標右營外委五十五年升本職美玉直隸宣化人由行伍於乾隆五十四年拔補萬全營外委尋升本職忠直隸清苑人由行伍於嘉慶元年拔補順德營外委隨剿教匪奮勇殺賊拔補本職榮長安人由行伍隨征金川屢著戰績拔補本職

右 國史館本傳